

**Ammasumik sulianut immikkoortiterineq ammasumik
 suliariumannittuussarsissarnerni sallitinneqartarnissaat taamaalillunilu suliffiit
 sungiusarfiusut sapinngisamik
 qulakkeerneqarnissaat pillugit sanaartornermi neqerooruteqartitsisarneq pillugu
 Inatsisartut inatsisaat nr. 11, 2. december 2009-meersup UKA 2012-imut
 allanngortinneqarnissaanik Naalakkersuisut suliaqaqqullugit peqquneqarnissaannik
 Inatsisartut aalajangiiffigisassaattut siunnersuut.
 (Inatsisartunut ilaasortaq Knud Fleischer, Kattusseqatigiit Partiat)**

Akissuteqaat

(Ineqarnermut, Attaveqarnermut Angallannermullu Naalakkersuisoq)

Siunnersuummi matumani pitsasumik silatusaartumillu siunertaqartoqarnera tamatta isumaqatigiissutigisinnaagunarpapput. Pingaartumik sanaartornermi ilinniarfissanik amerlanerusunik pissarsinissamik ilungersuuteqarneq pineqartillugu. Taamaakkaluartoq Naalakkersuisut isumaqarput sanaartornermi neqerooruteqartitsisarneq pillugu Inatsisartut inatsisaata – ulluinnarni neqerooruteqartarneq pillugu inatsimmik taaneqartartup – allannguiteqartinneqartinnissaa eqqortumik aqqutissaasorinanngitsoq.

Taamaattumik pisortat sanaartugassaataasa aamma sanaartugassat pisortanit tapiiffigineqartut suliassakuutaarlugit neqeroortitsivigineqartalerlugit aaqqissuussinerup, imminermini suliffeqarfinnut minnerusunut annertunerusumik unammillersinnaassuseqalersitsisinnaanissaa qularnarpoq. Taamatummi aaqqissuussinikkut tamanut suliariumannittuussarsiuussinerni suliffeqarfinnit annerusunit unammillerneq unitsinneqartussaanngilaq.

Siunnersuuteqartoq naapertorlugu suliassamik tamakkiisumik suliaqartitsisarnerit tamatumani akornutaapput. Taamaattorli Namminersorlutik Oqartussani 2010-mi naatsorsuinerme paasinarsivoq, Namminersorlutik Oqartussat kommunilluunniit neqeroortitsisuunersut apeqqutaatinagu, suliassakuutaaraluni suliaqartitsisarneq annertuumik atorneqartartoq.

Sanaartugassanik annertuunik suliaqarnissami pingaaruteqarpoq entreprenørerip sulisoqarneq, atortut aningaasaqarnerlu eqqarsaatigalugit, pisinnaasanik pisariaqartinneqartunik peqarnissaa. Taamaattumik suliffeqarfiiit minnerusut sanaartugassanik angisuunik suliariinneqataarusuttut suliffeqarfinnik allanik kattusseqateqartariaqaraluarpot imaluunniit suliassami suliakkerneqarsinnaasutut imminnut neqeroorutigalutik.

1990-ikkunni ukiorpassuarni nalunaarutikkut peqqussutaavoq pisortat sanaartorneri sanaartornerilluunniit pisortanit tapiiffigineqartut tamarmik suliassakuutaarlugit neqeroortitsivigineqartassasut. Ilaatigut entreprenøreritut mesteritullu suliffeqarfiiit minnerusut eqqarsaatigineqarnissaat siunertaasimavoq.

Piffissamiilli tassannga misilittakkat pitsasuinnaanngillat. Suliassakuutaaraluni neqeroortitsisarnissamik pisussaaffeqarneq ecarpallaartoq paasinarsisimavoq tamannalu

pingaartumik sanaartugassani annerusuni sunniuteqarluartumik ingerlatsinissamut tuttarsimalluni. Aaqqissuussineq suliaqarfimmi suliffeqarfinnut unissaataaginnarsimavoq suliffeqarfiillu minnerusut piginnaasaannik ineriartortitsinissamik siunertaasoq anguneqarsimanani.

Neqerooruteqartitsisarneq pillugu inatsit, sanaartugassaq pineqartoq apeqqutaatillugu neqeroortitseriaatsimik naleqqunnerpaamik toqqaanissamut eqaannerusumik periarfissaqartitsinissaq siunertarerpiarlugu ilusiligaavoq. Siunertaq tassaavoq unammilleqatigiisitsilluarnissaq sanaartornermillu ingerlalluuarsaanissaq, taamaalilluni pisortat aningaasaliissuutaat atorlugit sapinngisamik annertunerpaamik sanaartortitsilluni.

Naalakkersuisut isumaqarput pisariaqartitat piumasaqaatillu assigiinngitsut malillugit suliaqartitseriaatsimik naleqqussaasinnaaneq neqerooruteqartitsisarneq pillugu inatsimmit peerneqassagaluarpat, inuiaqatigiinni teknologiikkut aningaasaqarnikkullu ineriartortitsineq kinguariassasoq.

Inissiat amerlanerit najukkami suliffeqarfinnit sananeqartarnissaat pillugu Naalakkersuisooqatigiinnissamik isumaqatigiisummi anguniagaasumi isumaavoq, inuiaqatigiit sanaartornermut tunngasuni unammisassaat sapinngisamik suliffeqarfiiit nunatsinneersut – angisuut mikisullu – aqtsisorisavii nunami maaniittussaasut, peqataaffigisaannik isumagineqartassasut.

Tamanna inuussutissarsiuteqarneq pillugu inatsimmi malittarisassaqartinneqarpoq. Suliffeqarfik nunami maani sanaartornermik isumaginnissinnaassaguni, Inuussutissarsiummik Ingerlataqartunik Nalunaarsuiffimmi (IIN) nalunaarsorsimassaaq.

Taamatuttaaq soorunami pingaaruteqarpoq najukkami sulisuuusut sanaartornermik suliassaqarfimmi suliffeqartinneqarnissaat.

Suliffeqarfifit sanaartornermik sulianut sulisunik atorfinititsisarnermanni, avataaniit suliffissarsiortut killilersimaarnissaat pillugu nalunaarut malittussaavaat. Nalunaarummi malittarisassat malinnejarnersut kommunimi suliffissarsiuussisarfit nakkutigisaraat.

Ilinniarfinnik pilersitsinissamut tunngatillugu pisortat sanaartornerini sanaartornerniluunniit pisortanit tapiiffigineqartuni 3 mio. koruunit sinnerlugit naleqartuni ilinniartunik atorfinititsisarnissaq nalunaarutikkut minnerpaaffeqartillugu piumasaqaataavoq. Suliffeqarfifit pisortat tapiiffigisaannik sanaartornernik isumaginnittuusut tamarmik minnerpaatut piumasaqateqarnermi pineqartunut ilaapput – sanaartornerup nalinga apeqqutaatillugu tamatuma ikinnerpaamik ilinniartunik pingasunik atorfinititsinissaq kingunerisinnaavaa.

Maannakkut Naalakkersuisut pisortat sanaartugassaannik sanaartugassanilluunniit pisortanit tapiiffigineqartunik neqeroortitsinermi inuiaqatigiit aningaasaqarnerannik nukittorsaanissaq eqqarsaatigalugu suliniuteqarput.

Ilaatigut siunertaavoq nunatsinni sanaartornermik suliassaqarfimmi piginnaasanik ineriartortitsinerup siuarsarneqarnissaa, assersuutigalugu suliakkerneqartumit suliakkerneqarsinnaasunik toqqaanikkut, ilaatigullu siunertaalluni suliassaqarfimmi assersuutigalugu ilinniartunik atorfinititsinikkut sulisunik ilinniartitsinerup

siuarsarneqarnissaa. Aammattaaq pissutsit allat, assersuutigalugu akileraartarnermut tunngasut, avatangiisirut tunngasut il.il. ilanngunneqarnissaannut periarfissat misissorneqarnissaat eqqarsaataavoq.

Ukiup ingerlanerani kingusinnerusukkut – Naalakkersuisut sinnerlugit – Inatsisartunut aalajangersimasumik saqqummiinissara pilersaarutaavoq.

Taamatut oqaaseqarlunga Naalakkersuisut sinnerlugit siunnersuutip suliarineqarnerata, Inatsisartut 2011-imi ukiakkut ataatsimiinneranni ingerlaqqinnissaa siunertaralugu ataatsimiitaliami suliarineqartussangorlugu ingerlateqqinnejarnissaa inassutigaara.